

- *1. وزیر اعظم نریندر مو دی روس تے اسٹریہ غا 3 روزہ دورہ ور روانہ ہو گیا ہیں۔ انہاں نے کہیو جے یہ دورہ دوہاں مُلکاں نال تعلقات ڈونگا منان غو عمدہ موقعو ہے۔
- *2. طبی امتحان غا سلسلہ مانہہ سپریم کورٹ نے 38 عرضیاں ور سنوائی شروع کر دتی ہے۔
- *3. صحت خدمات بارے دائریکٹوریٹ کشمیر نے شری امرناتھ جی یا ترا 2024 واسطے پونی ایمبولینس سروس متعارف کرائی ہے۔
- *4. تے مرکزی وزیر جی کشن رڈی نے کہیو جے دوائیاں بارے صنعت غی حمایت لازمی ہے تا نچے مُلک غو وکست بھارت مقصد حاصل کیو جا سکے۔

PM Daparture Statement

وزیر اعظم نریندر مو دی اج روس تے اسٹریہ غا اپنا 3 روزہ دورہ ور روانہ ہو گیا ہیں۔ روس غا دورہ واسطے جہاز مانہہ سوار ہون تیں پہلاں وزیر اعظم مو دی نے اک سماجی ذرائع ابلاغ پوسٹ مانہہ کہیو جے یہ دورہ روس تے اسٹریہ نال تعلقات ڈونگا کرن واسطے عمدہ موقعو ہے۔ جس سنگ بھارت نانہہ دوستی آزمان غو وقت ملیو ہے۔ جناب مودی نے یوہ وی کہیو جے ان مُلکاں مانہہ رہ رہی بھارتی برادری نال ویں گل کرن در اگے دیکھ رہیا ہیں۔ وزیر اعظم مو دی 22 واں بھارت روس سالانہ اجلاس مانہہ شرکت کریں گا۔ جد کہ اسٹریہ غو یوہ اُن غو بُن تک غو سب تیں پہلو دورو ہے بھارت روس تعلقات بارے وزیر اعظم نے کہیو ہے جے ویں دو طرفہ تعاون غا تمام پہلوں غا جائزہ آئے پاسے اگے دیکھ رہیا ہیں۔ وزیر اعظم نے کہیو جے بھارت اور روس ہشکا ر خصوصی تے مراعات یافتہ حکمت عملی نے پچھلا 10 بہراں مانہہ کئیں سیکٹراں مانہہ ترقی کی ہے۔ ان سیکٹراں مانہہ توانائی، سلامتی، تجارت، سرمایہ کاری، صحت، تعلیم، ثقافت، سیاحت تے لوکاں غا لوکاں سنگ تبادلہ شامل ہیں۔ اسٹریہ غا اپنا دورہ بارے وزیر اعظم مو دی نے کہیو جے اسٹریہ بھارت غو ثابت قدم تے قابلِ اعتماد حصے دار ہے۔ تے دوائے مُلک جمہوریت اور اجتماعت غا تصور سانجھا کریں۔ وزیر اعظم نے کہیو جے ویں صدر تے چانسلر نال ملاقات کریں گا۔ وزیر اعظم نریندر مو دی تے روس غا صدر ولاد میر پٹن دوہاں مُلکاں ہشکار تعلقات غو جائزو لیں گا۔

SC NEET Hearing

سپریم کورٹ نے نیٹ انڈر گریجوٹ امتحان بارے درخواستاں غی سنوائی شروع کر دتی ہے۔ ان عرضیاں مانہہ امتحان بارے بے قاعدگیاں غو الزام لاتاں واں تازہ امتحان منعقد کرن غی ہدایت غی مانگ کی گئی ہے۔ اس سلسلہ مانہہ وکیلاں نے نمائندگی کرتاں واں کہیو جے ویں پیپر لیک ہون غی بنیاد ور امتحان منسوخ کرن غو مطالبو کریں۔ اس سلسلہ غا جواب مانہہ عدالتِ عظمیٰ نے کہیو جے امتحان غی منسوخی انتہائی اخیری حربو ہے۔ قابلِ ذکر ہے جے جسٹس ڈی وائی چندر چوڈ، جسٹس جے بی پرڈی والا تے جسٹس منوج مشرا ور مشتمل اک بنچ اج امتحان بارے رے گل 38 درخواستاں ور سنوائی کر رہیو ہے۔

Encounter Kathua

ضلع کٹھوعہ غا مچھیٹی علاقہ مانہہ دہشت گردان تے حفاظتی دستاں بشکار اک ٹاکرو شروع ہو گیو ہے۔ سرکار ی ذریعیاں نے دسیو ہے جے پولیس تے حفاظتی غی سانجھی ٹیم مچھیٹی علاقہ مانہہ تلاشی کاروائی غے دوران گولی باری غی لپیٹ مانہہ آگئی۔ جس غو حفاظتی دستاں نے جواب دتو۔ اس سلسلہ مانہہ مزید تفصیل غی اجوں اڑیک ہے۔

BBBP Rajouri

بیٹی بچاؤ بیٹی پڑھاؤ مہم نانہہ بابدو دین واسطے اج آئی ٹی آئی راجوری مانہہ اک کمپیوٹر کو رس پروگرام شروع کیو گیو۔ جس غو افتتاح ڈپٹی کمشنر راجوری اوم پرکاش بھگت نے کیو۔ ضلع راجوری غا بکھ بکھ علاقیاں تیں 125 لڑکیاں اس کو رس تیں فائدو حاصل کر رہی ہیں۔ موصوف نے آئی ٹی آئی راجوری غی طرفوں لایا گیا اسٹالان غو وی معاینو کیو۔ مہارا نمائندہ نال گل کرتاں واں ڈپٹی کمشنر نے اس طرح کہیو۔ بائٹ۔

Poonch CSM

ضلع پولیس پونچھ نے شہر غا ڈاک بنگلو مانہہ سول سوسائٹی غی اک میٹنگ منعقد کی۔ اس میٹنگ مانہہ مذہبی لیڈراں، مذہبی تنظیمیاں غا نمائنداں، سیاسی جماعتاں غا عہدیداراں تے نوجواناں نے حصو ليو۔ میٹنگ غی صدارت ایڈیشنل ایس پی پونچھ مشیم احمد نے کی جد کہ ایس ایس پی پونچھ جگل منہاس مہمان خصوصی تھا۔ اس موقع ور تمام لوکاں نے اپنا خیالات غو اظہار کیو تے پولیس نانہہ کہیو جے واہ ہر مسئلہ ور تعاون کرے۔ نالے محرم اور شری بڈھا امرناتھ یا ترا غے دوران پورا تعاون غی یقین دہانی کراوے نالے بھائی چارو برقرار رکھے۔ اس موقع ور بولتاں واں ایس ایس پی پونچھ نے اس طرح کہیو۔ بائٹ۔

Reasi Training

ضلع ریاسی گا سُرمان گراں غا اک بسنیک کرندیپ سنگھ جہیڑو بھارتی فوج غو جوان بے چھٹی غے دوران ضلع ریاسی غا سُرمان گراں مانہہ چناب دریا غے کنڈے مقامی نوجواناں نانہہ خود حفاظت بارے تربیت دے رہیو ہے۔ تانجے قصبہ مانہہ کسے وی ماڑی صورتحال غو مقابلو کیو جا سکے۔ انہاں نے بغیر ہتھیار غے مقابلو کرن غی تکنیک دسیں۔ مہارا نمائندہ نال گل کرتاں واں اک مقامی لڑکا نے اس طرح کہیو۔ بائٹ۔

Mugal Road

جموں سرینگر قومی شاہراہ غی اک متبادل مغل روڈ پسی پین غا نتیجہ مانہہ بند ہو گئی ہے۔ مہارا نمائندہ انوبہو مصری غے مطابق حکام نے ٹریفک بحال کرن واسطے کوشش شروع کر دتی ہیں۔ حالانکہ چل رہیا موسمی حالات تے ملبہ غا ڈھیر غے مد نظر سڑک پوری طرح نال دوپا رہ قابل کار بنان مانہہ کجھ وقت لگ سکے۔ مسافراں نانہہ مشورو دتو گیو ہے جے ویں حالات بارے باخبر رہیں تے سفر شروع کرن گو منصوبو موسم تے حالات غے مد نظر بناویں۔

یہ خبر تم آکا شوانی جموں تیں سن رہیا ہیں خبراں گا باقی حصہ نال ظفر اقبال۔

Pooney Ambulance Secure

صحت خدمات با رے ڈائریکٹوریٹ کشمیر نے شری امرناتھ جی یا ترا 2024 غا سلسلہ مانہہ یا تریاں نانہہ سفر غے دوران طبی دیکھ بھال غی حمایت با رے گھوڑا خچراں ور مشتمل ایمبولینس متعارف کرائی ہے۔ ڈائریکٹر صحت خدمات کشمیر ڈاکٹر مشتاق احمد راتھر نے سیکریٹری صحت تے طبی تعلیم ڈاکٹر سید عابد رشید شاہ غی رہنائی مانہہ یوہ قدم چایو جس غی یا تریاں نے بڑا پیمانہ ور تعریف کی ہے۔ مذکورہ ایمبولینس مانہہ طبی سامان رکھیو گیو ہے۔ جس مانہہ آکسیجن غا سلینڈر وی شامل ہیں۔ صحت تے طبی تعلیم غا سیکریٹری ڈاکٹر سید عابد رشید شاہ نے محکمہ صحت غی اس ایجاد غی تعریف کی تے کہیو جے ہم شری امرناتھ جی غا یا تریاں غی بہتری یقینی بنان غا وعدہ غا پابند ہاں۔ قابل ذکر ہے جے اس ایمبولینس پونی خدمت سنگ یا تریاں غو یا ترا غے دوران اعتماد تے تسلی بدھے گی۔

SANJY yatrai Niwas

گذشتہ 9 دنان مانہہ تقریباً 1 لکھ 50 ہزار تین متا امرناتھ یا تریاں نے بابا برفانی غا درشن کیا ہیں۔ اس سلسلہ مانہہ جموں غا بھگوتی نگر یا تری نواس مانہہ یا تریاں غی کافی بھیڑ لگی وی ہے۔ جموں کشمیر انتظامیہ نے امرناتھ یا تریاں غا ربن بارے زبردست بندوبست وی کیو وہ ہے۔ قابل ذکر ہے جے محکمہ سیاحت تے اطلاعات بارے پریس انفارمیشن بیورو نے یا تریاں غی تفریح واسطے وی بہترین انتظامات کیا وا ہیں۔ یا تریاں غی تفریح واسطے گلو کار آریا ہیں تے وے ات آگے بابا امرناتھ گا بچھن گا ریا ہیں۔ میڈیا سنگ گل کرتاں واں یا تریاں نے انتظامیہ غی طرفوں اُن واسطے بندوبست کرن بارے کُجھ اس طرح کہیو۔۔۔ ہا نٹ۔

Reddy Pharma

کوئلہ تے کان کنی غامرکزی وزیر جی کشن رڈی نے کہیو ہے جے مُلک غا وکست بھارت بنان غا ہدف نانہہ پورو کرن واسطے دوائیاں غا کارخانہ غی اشد ضرورت ہے۔ بھارت فارماتیکل کا نگریس غی 73 ویں میٹنگ سنگ گذشتہ کل حیدرآباد مانہہ خطاب کرتاں واں جناب رڈی نے کہیو جے مُلک عالمی سطح ور معیشت غا لحاظ نال 5 ووں بڑو مُلک بن گیو ہے۔ تے بھارت غو ہدف ہے جے وہ 5 ٹریلین ڈالر آلی معیشت غو مُلک بنے گو۔ وزیر موصوف نے مزید کہیو جے وزیر اعظم مودی نے سال 2027 تک بھارت نانہہ تیجی بڑی معیشت آلو مُلک بنان غو عہد کیو ہے۔ جناب رڈی نے کہیو جے مُلک نے گذشتہ سال اک لکھ 83 ہزار کروڑ روپیہ غی دوائی باقی مُلکاں نانہہ بیچی ہیں۔ اُنہاں نے کورونا ویاہ بارے گل کرتاں واں کہیو جے بھارت نے اُس ویلے کرونا غی دوا تیار کر غے سارا مُلکاں نانہہ دے غے تمام مُلکاں غی مدد کی۔

Capex Budget Kathua

مالی سال 25/2025 واسطے ضلع کٹھوعہ غا ڈی سی آفس کمپلیکس مانہہ منعقدہ کپیکس بجٹ غی میٹنگ مانہہ 90 کروڑ 20 لکھ کپیکس بجٹ منظور ہوا ہیں۔ کپیکس بجٹ غی میٹنگ غی صدارت ڈی ڈی سی غا چیرمین مہان سنگھ نے باقی بلاکاں گا ڈی ڈی سی ممبران غی موجودگی مانہہ کی۔ جت ضلع کٹھوعہ غا ترقیاتی کمشنر راکیش منہاس وی موجود ریا۔ اس بجٹ مانہہ عوام غا مدعا وی اُجاگر کیا گیا۔ اس سلسلہ مانہہ مہارا نمائندہ پردیپ شرما نال گل کرتاں ضلع ترقیاتی کمشنر راکیش منہاس تے ڈی ڈی سی چیرمین مہان سنگھ نے اس طرح کہیو۔۔۔ ہا نٹ۔
